

tis institutione lectæ sunt: sed utramque quæstionem seposuerunt Patres. Item, alia relatio ejusdem Congregationis de mulctis imponendis in dispensationum concessione, lecta est: sed negotium istud melius Conciliis Provincialibus relinquendum duxerunt.

Tandem Congregatio de gravaminibus relationem attulerunt de querelis contra Ludovicopolitanum, propter ejus agendi rationem super cœmeterio quodam Germanorum. Secretarium jusserunt Patres iis qui querelas suscitarent respondere, juxta verba prædictæ relationis, Revmum et Illmum D. Ludovicopolitanum in eo negotio non nisi juris canonici præceptis, et Conciliorum Baltimorensium statutis obtemperasse. Hoc Secretarius die Jovis perfecit.

Dein, quum de novis Sedibus esset agendum, abierunt Secretarii.

CONGREGATIO SEPTIMA ET ULTIMA PUBLICA.

ADFUERUNT Revm Archiepiscopi et Episcopi omnes, Ordinum Religiosorum Superiores, et theologi.

Inter theologos iterum argumentum erat de paræciarum institutione, et de districtuum ecclesiasticorum partitione.

Antequam huic Congregationi ultimæ publicæ finis imponeretur, Revmus et Illmus D. Archiepiscopus Baltimorensis blande theologos allocutus est, eorumque diligentiam doctrinamque in gravissimis argumentis agitandis, modestiamque in sententiis edicendis præclaram, amplissimis verbis commendavit.

CONGREGATIO NONA PRIVATA,

DIE MERCURII, MAII 19, HORA 10 A. M. HABITA.

ADFUERUNT Patres omnes cum Officialibus.

Lecta est epistola ad SS. D. Papam, nomine Concilii mittenda, quam quum approbassent Patres, voluerunt eam nitide conscribi, ita ut post Congregationem postmeridianam, singuli ei subscribere possint.

Latum est decretum, *Quum sapientissimo consilio.*

Propositum fuit Societates ad scholas catholicas sustentandas instituere; sed votis Patrum exquisitis, dum quindecim statuendas vellent, sexdecim in partem contrariam iverunt.

Lata sunt decreta sequentia: *Visum est Patribus valde expedire*, de Cancellariis statuendis; *Consultum Episcopis*, de Seminariis ecclesiasticis; *consultendum episcopis ut in suis*, de librorum examine; *Ne de vi et obligatione*, de promulgatione decretorum hujus Concilii.

Proposito quodam decreto de cœmeteriis, illud sancire noluerunt Patres: pariter Societatem ad jura fidelium tuenda instituere recusarunt.

Pittsburgensi, Carolopolitano et Ludovicopolitano onus datum est curriculum studiorum satis amplum designare, cui Seminariorum ecclesiasticorum alumni sese dent.

Tunc, quum de nominationibus esset agendum, recesserunt Secretarii.

CONGREGATIO DECIMA PRIVATA,

DIE MERCURII, MAII 19, HORA 5 P. M. HABITA.

HABITA est hæc Congregatio in ædibus Archiepiscopalibus. Adfuerunt Patres omnes cum Officialibus.

Lata sunt decreta sequentia: *Hortantur Patres ut ubique*, de piæ ad propagandam fidem Societatis in hisce Provinciis institutione; *Commendamus fidelibus*, de precibus pro conversione acatholicorum; *Expedit episcopos normam*, de censuris ferendis; *Societates omnes*, de Societatibus quibusdam laicorum; *Hortandos episcopos*, de consilio sacerdotum adhibendo; *Patres censuerunt*, de ratione rerum temporalium ecclesiarum administrationis quotannis exigenda; *Moneant episcopi sacerdotes*, de scholarum cura.

Iterum lecta sunt ista et multa ex decretis jam latis, ut cuique copia esset emendationes proponendi.

Iterum perlectæ sunt et approbatæ epistolæ sequentes:

Epistolæ tres ad summum Pontificem.

Epistola una ad Eñum Principem JACOBUM PHILIPPUM, S. R. E. Cardinalem FRANSONI, S. Congregationis de Propaganda Fide Præfectum.

Epistola Pastoralis ad clerum populumque harum Provinciarum.

Epistola a Mobiliensi, gallico sermone conscripta, ad piam ad propagandam fidem Societatem.

Epistola a Philadelphiensi, germanico sermone, ad piam Leopoldinam, aliasque Germaniæ Societates, scripta.

Epistola a D. Montisregis ad Illmum et Revmum Archiepiscopum Mexici.

Dein, quum de novis Sedibus esset agendum, recesserunt Secretarii.

Circa finem istius Congregationis, recedente Illmo et Revmo D. Præsidente, Patres ex consilio Revmi et Illmi D. Archiepiscopi Cincinnatensis, noluerunt finem huic Concilio imponere quin Revmo et Illmo D. Archiepiscopo Baltimorensi, Sedis Apostolicæ Delegato, gratias maximas agerent.

CONGREGATIO UNDECIMA ET ULTIMA PRIVATA,

DIE JOVIS, MAII 20, FESTO ASCENSIONIS D. N. J. C.
HORA 9½ IN ÆDIBUS ARCHIEPISCOPALIBUS HABITA.

ADFUERUNT Patres omnes cum Officialibus.

Perlecta sunt reliqua ex decretis jam latis, ut cuique Patrum liceret emendationes proponere, aut verba limare.

Lecta quoque est, et approbata epistola ad Illmum et Revmum D. PAULUM CULLEN, Archiepiscopum Armacanum, Primate[m] totius Hiberniæ, a Baltimorensi conscripta, quum ab ea conscribenda sese heri excusasset Cincinnatensis.

SESSIO QUARTA SOLEMNIS,

DIE JOVIS, MAII 20, QUI ERAT FESTUM ASCENSIONIS D. N. J. C.

HORA 10½, facta est processio Patrum omnium, Ordinum Religiosorum, Congregationumque Superiorum, theologorum et multorum sacerdotum, eodem ac Dominicis præteritis ordine, ab ædibus Archiepiscopalibus ad ecclesiam Metropolitanam. Missam Pontificalem celebravit Illmus et Revmus

D. Neo-Aurelianensis, cui adstiterunt archidiaconus, Adm. Rev. D. F. LHOMME; diaconus, Rev. D. EDUARDUS QUIGLEY; subdiaconus, Rev. A. J. ELDER: diaconi vero prope thronum assistentes fuere Adm. Rev. D. H. B. COSKERY, et Rev. D. T. FOLEY.

Absoluta Missa, concionem ad populum habuit Ill^mus et Rev^mus D. Bostoniensis. Dein cantati sunt psalmi et orationes juxta præscripta Pontificalis Romani pro ultima Sessione.

His finitis, Secretarius alta voce perlegit decreta omnia, iis exceptis quæ Dominica præcedenti lecta et approbata fuerunt. Tunc instante Rev^mo Promotore, Rev^mus et Ill^mus Archiepiscopus Baltimorensis Patres allocutus est: *Placetne vobis, venerabiles Fratres, hæc quæ lecta sunt decreta approbare, et confirmare?* Omnibus autem respondentibus, *Placet, approbamus, confirmamus*; ex mandato ejusdem Rev^mi Præsidis, id proclamavit Secretarius, his verbis:

Nos, Franciscus Patritius, Archiepiscopus Baltimorensis, et Sedis Apostolicæ Delegatus, alique Archiepiscopi et Episcopi, in hoc sacro Concilio Plenario adunati, decreta hæc quæ mox lecta sunt, approbamus, et confirmamus.

Deinde Patres omnes decretis super altare majus positis nomina juxta ordinem subscribere.

Rev^mus et Ill^mus D. Baltimorensis tunc a Patribus petiit, num eis placeret decreta ista ad pedes SS^mi D. N. Papæ per manus Chicaginis deferri, ut S. Sedis revisioni et recognitioni subjiciantur: cui omnes libenter assensum præbuerunt.

Ill^mus et Rev^mus D. Archiepiscopus Neo-Eboracensis surgens inter Patres, tunc nomine omnium

gratias amplissimas Rev^mo Baltimorensi, Delegato Sedis Apostolicæ, egit, eique et omnibus de Concilio ad tam felicem exitum perducto, verbis gravissimis, et ad commovendos animos aptissimis, gratulatus est. Rev^mus et Ill^mus D. Baltimorensis quum ei respondere vellet, lacrymis sermonem abrumpere coactus est.

Rev^mus Promotor tunc petiit finem Concilio imponi: Rev^mus autem Archipræsul Patres interrogavit: *Venerabiles Fratres, placetne vobis, ad Dei omnipotentis laudem, hujus Concilii Plenarii finem jam fieri?* Respondentibus singulis, *Placet*; ita prosecutus est Secretarius:

Nos Franciscus Patritius, Archiepiscopus Baltimorensis, Sedis Apostolicæ Delegatus, alique Patres qui huic Concilio Plenario intersumus, quum absoluta sint quæ pro temporis ratione agi gerique posse videbantur, quumque pastoralis cura ad Ecclesiarum nostrarum status et pastorales vigiliis revocet, propterea huic sancto Concilio finem imponi censuimus.

His peractis, et stantibus omnibus, factæ sunt Acclamationes.

ACCLAMATIONES.

Archidiaconus. Regi seculorum immortalis, Omnipotenti DEO, sempiternus honor et æterna gloria.

Chorus. Dignus est Dominus Deus noster accipere gloriam, et honorem, et benedictionem in secula seculorum.

Archid. Sanctissimæ et Immaculatæ Virgini, Dei genitrici MARIE, reverentia, laus, et piissima gratulatio.

Chorus. Beatam illam dicant omnes generationes, et sit benedicta in æternum.

Archid. Beatissimo Pio Papæ, successori principis apostolorum, totius Ecclesiæ capiti, ac verò Christi in terris vicario, pax a Deo, et omnimoda prosperitas.

Chorus. Effundat super eum Deus noster abundantes divitias gratiæ suæ, tantumque pontificem diu Ecclesiæ suæ sospitem et incolumem servet.

Archid. Revm̃o Archiepiscopo Baltimorensi, Sedis Apostolicæ delegato, et hujus Concilii Plenarii præsidi, cum multis annis plurimæ gratiæ.

Chorus. Jam in præsentî tempore accipiat benedictionem a Domino, et in futuro seculo coronam gloriæ.

Archid. Revm̃is Archiepiscopis et Episcopis qui ad hoc celebrandum Concilium accesserunt, incrementum donorum cœlestium, et felix ad suas ecclesias reditus.

Chorus. Gratia Domini Nostri Jesu Christi, et charitas Dei, et communicatio sancti Spiritus, sit cum omnibus illis.

Archid. Admodum Rev. Abbatibus et Communitatum Superioribus, ac theologis, qui præsentia, doctrina, laboribus, patres Concilii tam egregie juvunt, magnæ grates, et bona in Christo memoria.

Chorus. Magnæ grates, bona memoria: Dominus retribuat.

Archid. Cunctis fidelibus nostrarum Provinciarum, ac universo populo Christiano, gratia et pax a Deo Patre, et CHRISTO JESU Domino nostro.

Chorus. Ipse Deus pacis sanctificet eos per omnia, ut quietam et tranquillam vitam agant in omni pietate, castitate, ac praxi bonorum operum.

Archid. Decreta hujus sanctæ synodi assidua veneratione prosequamur, et fideliter custodiamus.

Chorus. Semper veneremur, semper custodiamus.

Archid. Juxta monitum apostolicum et propheticum, satagamus nos, fugientes mundi corruptionem, constanter adhærere Deo, donec occurramus omnes in mensuram ætatis plenitudinis Christi, et in terram viventium.

Chorus. Amen, amen.

Tum denique cantatus est ab omnibus hymnus *Te Deum*, necnon ab Archiepiscopo Baltimorensi præscriptæ Orationes; et impertita ab eodem solemnî benedictione, omnes processionaliter ad ædes Archiepiscopales reversi sunt.

DECRETA CONCILII.

I. **P**ATRES hujus Concilii Plenarii, ex omnibus Statibus Fœderatis Americæ Septentrionalis congregati, præside Archiepiscopo Baltimorensi tanquam Apostolicæ Sedis Delegato, summum quo Sedem Apostolicam Romanam prosequuntur, obsequium profitentur: agnoscunt quippe, juxta definitionem in Concilio Florentino promulgatam, Romanum Pontificem successorem esse beati Petri principis Apostolorum, et verum Christi Vicarium, totiusque Ecclesiæ caput, et omnium christianorum patrem et doctorem existere, et ipsi, in beato Petro, pascendi, regendi et gubernandi universalem Ecclesiam a Domino nostro JESU CHRISTO plenam potes-